

展限則凡在瞻聆孰不感激依該曹之啓兩湖貢案亦為裁損以示終始勤恤之至意俾無不均之歎而他日覆審時依詳定元數為之實合事宜右議政吳允謙以為今見戶曹之啓兩湖之民獨不蒙裁損之德量宜裁減俾與慶尚咸鏡之民均蒙惠澤他日復舊時亦當一體施行云從之○接伴使元鐸馳啓言都督分付曰雲從島管下不下四千餘名而時無一升之米餉使處催督五萬石蓋都督自見詔使奏本兵部覆題之後氣勢頗張今則直為發票督令前頭難處之患不一而足云○壬戌 上下教曰寡昧忝位以來國內多事澤不下究拜將失宜逆豎逞凶戍卒之從賊罪在寡躬是以殲賊之報雖至致賊之咎實深無樂為君慚懼罔已上供之中可蠲者蠲之可減者太半減損以除民生一分之弊厥後廷臣或以為上供雖曰蠲減而徵賦猶前故民不知減損之意云予用恠訝而疑其或者之言不實矣昨見戶部啓辭則兩湖之民獨未蒙惠噫彼民奚罪焉國事如此宜乎百姓之謂我不愛民也其令該曹兩道五結收布量宜蠲減使之均蒙實惠○夜東方天際有氣如火光○癸亥平安監司尹暄馳啓曰唐將徐孤臣言賊將劉愛塔開原之人而早年被擄者也使獐子李姓者持諺書出送曰奴酋死後第四子黑還勃烈承襲分付先搶江東以除